

浙江文叢

查慎行集

〔第六冊〕

浙江出版聯合集團
浙江古籍出版社

浙江文叢

查慎行集

〔第六冊〕

敬業堂詩集四

敬業堂詩續集

〔清〕查慎行 撰 張玉亮 辜艷紅 點校

浙江出版聯合集團
浙江古籍出版社

敬業堂詩集卷四十四

步陳集

起乙未正月，盡五月。

謝病歸來，杜門七百日矣。不得已而作閨游。憶戊寅春夏間，偕朱丈竹垞南行，今往還仍取此路。東坡詩云：『團團如磨牛，步步踏陳跡。』用以名集，聊當解嘲。

元日立春大雪

家居閱兩年，連遇歲朝雪。東風不解凍，就我作冷節。鄰比莫往來，應門乃虛設。野人喜無事，復此庭宇潔。薺麥正青青，蘭芽爲誰茁。

二日喜晴

昨日既喜雪，朝來復快晴。開軒納東曦，檐滴微有聲。天豈去我遠，始和得人情。呼兒具紙筆，枕上詩已成。

四日西園散步得三絕句

算是今年第一回，草根殘雪尚堆堆。
春風氣力强於杖，扶起衰翁踏凍來。
三日爲期已過期，晴光先動碧琉璃。
苔枝照影魚兒躍，及取冰開鷺未知。
疏籬外繞翠檀欒，梅橋中栽五畝寬。
抵得實封三百戶，頭銜自署老園官。

人日赴榆村兄真率會二首

七十三翁齒最先，人言兄乃地行僊。
白頭兄弟肩相竝，不敢誇張說少年。
容易開尊得故鄉，況逢雪後好風光。
梅花消息巡檐近，絕勝題詩寄草堂。

上元前二日芝田弟招集深寧齋席上次韻

杖履從遊地，難忘直至今。余少日詩文極蒙伯父霍丘公賞識。風流前輩盡，結託晚年深。照座紅燈入，當杯白髮侵。懷新兼感舊，愁和郢中吟。

西阡老梅一本不知何人所植花時偶與諸兄弟婆娑其下芝田有詩再次韻
千林一樹特標奇，冰雪初消雨未滋。問著不知誰手種，却來與我伴衰遲。

送湯納時表弟赴吉水任三首

兩派江流百折灣，全家攜入畫圖間。
桃花夾岸春旗影，直到廬陵不斷山。
牧羊圈豕盡彈冠，一第終輸本分官。
不負種花心力在，吉州抹麗贛州蘭。
文江舊是人文藪，歷宋經元迄有明。
此段挽回須老手，莫言邑宰事權輕。

次韻答又微姪

平生持論笑孤高，老去羞稱供奉曹。
幸有田園收影跡，敢從壇坫薄風騷。
披吟滿卷輸君富，置酒當筵看客豪。
莫道懸車年未及，吾薪人爨已勞勞。
來詩有『未老投閒聲價高』之句，故云。

庭前紅梅花時恰值春寒

側側餘寒薄薄粧，疏花嫩蕊太郎當。
能禁臘底三番雪，翻怕春來十日霜。

次韻答東亭弟滇南見懷二首

自笑原非炙輶髭，一歸聊爾慰慚魂。
退飛事異冥鴻弋，俯啄心空澤雉樊。
伏臘鄉風隨戚黨，耕桑活計委兒孫。
只愁兄弟天南北，却聽清吟似峽猿。

字如黑〔一〕蟻筆頭髭，天末書寬久病魂。喜爾力能禁瘴癘，知余情頗戀丘樊。一門最盛推同祖，萬里相望各有孫。若論桑榆收未晚，莫因擇木感騰猿。用《晉書·李充傳》中事。

江行六言雜詩十八首

魯公傳乞米帖，元亮有饑驅詩。不妨舉家食粥，笑問此去何之？

人家泥浦漁浦，驛路樟亭赤亭。黃犢鳴邊草綠，畫眉啼處峰青。

船頭載餘杭酒，枕上看富春圖。老伴不離鷺鴨，浮踪又落江湖。

江流東射如箭，帆勢西張若弓。此去特邀天倖，平生逆水逆風。

一兩竿颺酒旆，四三點散漁燈。朝來露蓑長濕，月下風檣不停。

水色綠頭雄鴨，舟形縮項鯿魚。千點桃花拍岸，春潮不過桐廬。

挂劍謝皋羽墓，插竿嚴子陵壇。身後哭餘兩友，此句屬謝。生前笑擲一官。此句屬嚴。

乍合乍開煙靄，一重一掩霏微。紫鱗出網能躍，翠鳥踏波亂飛。

柳暗春旗古戍，梅殘橫笛孤城。留取三分花事，老夫待要山行。

村雞喚曙非一，野鷺眠沙必雙。時有飛星過水，忽看苦霧吞江。

蘭溪九迴腸曲，澱水一指掌平。鷺卵石多瀨淺，魚鱗雲起天晴。

三百餘年藝學，建文以後失傳。重過四先生里，白頭撫卷愴然。余近抄宋、元、明初文集，得金

華前輩數家。

門前二月楊柳，屋後千年豫章。村步稀栽杏樹，鄰船時遞蘭香。

碓牀^(二)多沉新漲，牛馬不辨兩涯。遙見一灘白鷺，近前知是浪花。

春分過後微雪，上已前頭嫩寒。灘響吾愁減睡，日長兒勸加餐。時稚子隨行。

太末城南最好，橘林密帶甘林。歲歲經秋充賦，直從禹貢到今。

長亭七十有四，川路縈紆倍艱。安穩煙波六宿，卸帆已到常山。

一笈曾陪朱老，浙西吟過江西。誰憐磨牛陳跡，自笑飛鴻雪泥。

發常山早雨午晴二首

七日江程上水難，肩輿差比布帆安。朝來更覺山行好，小雨纔過路便乾。

麥畦菜壠黃兼綠，李徑桃蹊白間紅。著色春光誰畫得，常山西畔玉山東。

西江櫂歌詞四首

西下鄱陽總順流，波聲汨汨櫓聲柔。玉山城外唱歌去，三十三灘是信州。

千尺長橋亘水隈，商船到此盡眠桅。索錢幸自無關吏，滿載漳^(三)煙建紙來。

黃牛引犢眠茅屋，烏鬼隨人上竹牌。共說此鄉魚米賤，就中最賤莫如柴。

兩頭舫子月纖纖，愁雨愁風日日兼。過客飽餐江右飯，居人貴買浙西鹽。江西十三郡，惟廣信食浙鹽。

樟樹鷺巢歌爲施渟如明府作

鉛山縣署南城坳，綠陰冬夏常相交。豫章之材凡五樹，上有鷺鷥來結巢。東風二月高禰祀，燕子來時歲相遇。哺雛引子直經秋，此是風標遺種處。前者代嬪如高曾，後者相繼如雲仍。雪衣飄然閱五世，螽斯蟄蟄還繩繩。我讀東京循吏傳，鴟變好音虎革面。雀雖不探童子仁，疇昔傳聞今眼見。施侯到官踰兩年，政成三異群稱賢。仁民及物物斯樂，飛鳥依人人自憐。此地昨曾經寇賊，安集哀鴻繫誰力。老夫重過十八年，煙火居然萬家邑。佳辰召客開華筵，葉鳧緱鶴同翩翾。酒酣爲爾賦長句，侯乎侯乎豈非僊。

渟如招遊蓮華洞四首

夾路泉聲響珮環，去城三里即名山。清遊我正坐無事，難得君侯如我閒。
一綫天光落眼前，洞門深入忽中穿。欲知覺路隨方樂，憑仗西來一指禪。洞壁有石如佛指。
興欲登高力已疲，隨身可少杖扶持。自憐濟勝全無具，踟蹰寧忘一蹶時。時余渡澗失足，故云。
兩家弟子生同異，朱陸紛如聚訟來。指點鵝湖榛莽路，講堂片席待重開。鵝湖山在縣北二十

里，君方議重修書院，故及之。

雨中度分水關

獨立千年石，回看百丈溪。浮雲自南北，健水各東西。俗吏憎書笈，勞人信杖藜。經過成熟路，不怕鷓鴣啼。

重遊武夷冲佑宮

十八年前夢，披圖勝跡留。萬峰雲忽散，九曲水仍流。物外戀清境，生涯回白頭。短筇何負汝，重作幔亭遊。

陳道士房見甌寧蔡鉉升明府留題作詩寄之

洞天三十六，此洞自秦開。羽士今寥落，琳宮幾劫灰。追游成昨夢，得句憶僊才。百里溪山近，雙鳧早晚來。

建溪櫂歌詞十二章 并序

朱子作武夷九曲櫂歌，亦偶然寄興云爾。其實九曲水淺，曾不容舟，余廣其意，作建溪櫂

歌詞，可使艚郎唱艚而行，俚語所不擇也。

清流船名尾大腹仍蟠，杉板船輕一擲梭。順水無風行更穩，漿聲如雁櫓如鵝。
石根一道水潏洄，真有腸如九曲迴。問渡亭前齊閣櫂，竹簾撐入武夷來。
不團小鳳不團龍，細色如今免上供。見說田家愁水旱，好充茶戶莫爲農。
西江估客建陽來，不載蘭花與藥材。點綴溪山真不俗，麻沙村裏販書回。
年年三月杜鵑啼，紅白花開似錦溪。只作漫山桃李看，不知中有海棠梨。
松柏難逃野火災，忽教山色變成灰。樵人比似猿猴捷，絕壁無梯負擔回。
不爭白狗黃牛峽，不數西江廿四灘。天下無如建溪惡，水中刀劍是峰巒。
北客南來飯好加，川程三百少魚蝦。建安腐乳甌寧酒，更有南鄉澤瀉花。
連山苦竹賤如毛，十節量成二丈高。小泊南鵝南口子，船船多換幾張篙。
青天白日走雷霆，黯澹危灘最有名。掣電光中行十里，船頭一轉即延平。
自從舟發崇安縣，直到洪塘與海通。若使一灘高一丈，幔亭合在半天中。
生小離家慣水行，濤波雖惡片篷輕。不須阿囡呼郎罷，但是同舟便有情。

訪同年滿鳧山開府於三山官舍撫今懷昔賦贈二章

宗臣久掌絲綸簿，開府兼優政事科。地是巖疆曾伏莽，公來鯨海不揚波。
刑清訟〔四〕簡神

何暇，望重官高氣轉和。坐使八閩風一變，挽回誰識苦心多。

曾陪京兆鹿鳴筵，共賦長楊羽獵篇。聯轡三回經出塞，下車一揖重同年。當時霄漢依光近，此日雲泥入望懸。不是先生能念舊，肯扶衰病到階前？

與劉海觀前輩話舊有感

三館當時數二劉，後來誰不仰風流。芝蘭臭味終相近，縞紵交情幸見收。自別道山虛接武，每從宦海閱沉浮。對君忍話京華事，宿草鴛鴦痛未休。傷令兄若干先生也。

尋道山亭故趾

芒鞋布襪記曾經，誰識蓬池舊謫星。雙眼參差收七塔，百年興廢閱孤亭。雲煙繞閣山形秀，浦溆通潮海氣腥。好在南豐碑一統，苔紋因雨洗猶青。

九僊山平遠臺

跨鯉人遙片碣留，居僧指點說丹丘。平生不信神僊術，垂老宜爲寂寞遊。千里帆檣來域外，九霄風雨過城頭。劇憐野色亭西路，好景多歸萬歲樓。

鳧山先生邀遊城東湯泉

萬壑千峰赴海疆，却從海眼發溫湯。名同繡嶺寧愁污，派別曹溪自有香。身外塵埃供洗滌，人間炎熱變清涼。依然沂水風雩意，童冠中間着老狂。時幕友沈、林二生、三公子俱在座，兒楨^(五)亦侍行。

老友林同人贈椶竹杖

海山產異竹，厥萌不常有。移君軒墀前，適用非適口。一年長一寸，寸寸累已久。碧玉內堅剛，椶皮外粗醜。尋丈經百年，居然竹中叟。金鴉鬬作杖，鉅細纔可手。下有根生鬚，上有葉垂箒。故人憐我老，分贈意良厚。衰遲形影孤，配爾如得偶。嘉惠胡敢忘，命之曰執友。

留別前輩鄭老先生

此遊真到鄭公鄉，許我重登佚老堂。南極一星留碩果，兩朝群望屬靈光。登山不用頻攜杖，好客猶能遠置莊。小吏相輕君勿怪，浮雲閱盡是炎涼。先生時爲邑令所窘，故云。

留別林同人

結交逢老輩，再見倍相親。開口問前事，聞聲知故人。林年將八十，目已喪明。衣冠非宿昔，

眠食尚精神。洪浦通潮海，毋辭惠訊頻。《唐書·地理志》：『侯官西南有洪塘浦，自石岵江東經壁瀆至柳橋，以通舟楫，即今之洪山橋也。』

住福州半月不及噉荔支而歸聞西禪寺老僧癡賣尚無恙臨行口占寄之

果熟西禪寺，朱竹垞吳青壇記並嘗。分甘紅計顆，漬蜜白盈筐。一飽事難料，獨遊神易傷。居僧應笑我，空到荔支鄉。

建寧遇同年張蒿陸張由詞館改知松溪縣今將移疾乞休詩以慰之

出宰松溪縣，行踰報政期。神清知善病，藥賤苦無醫。難得音書便，翻成邂逅奇。引年猶未及，莫負聖明時。

武夷精舍

早時蒙養地，晚節宦游途。風雨一精舍，溪山雙畫圖。居常鄰道院，交不廢緇徒。識者觀其達，何曾累大儒。

武夷采茶詞四首

荔支花落別南鄉，龍眼花開過建陽。行近瀾滄東渡口，滿山晴日焙茶香。

時節初過穀雨天，家家小竈起新煙。山中一月閒人少，不種沙田種石田。
絕品從來不在多，陰崖畢竟勝陽陂。黃冠問我重來意，拄杖尋僧到竹窠。山茶產竹窠者爲上，僧家所製遠勝道家。

手摘都籃漫自誇，曾蒙八餅賜天家。酒狂去後詩名在，用許嵴題詩岩事。留與山人唱采茶。

崇安梅容山明府貽武夷山志

芒鞋三度入名山，衰白重遊分已慳。今日圖經落吾手，巾箱攜得武夷還。

朝發小漿村暮抵紫溪途中口號四首

引得層層樹杪泉，高田瀉水及低田。占城旱稻移秧蚤，四月村翁掠社錢。
籃輿承蓋午風涼，戲折山花插兩旁。行處兒童齊拍手，白頭老子擁紅粧。
丹崖碧樹迴干霄，行盡巖關百里遙。日暮紫溪橋畔望，鷺鷥如雪點青苗。
編茅樊竹作村莊，樟樹花傳處處香。漫說兩邦封壤接，狹鄉終不及寬鄉。寬鄉、狹鄉出《唐

書·食貨志》。

鉛山道中

龜趺埋沒泥沙底，翁仲欹斜草棘間。漸覺先朝餘澤遠，耕牛犁到費家山。

重至南昌感舊

官步門前柳拂頭，早年曾作豫章遊。兩朝文物多經眼，千里江山復入舟。宿草淚深懸榻地，孤蹤分絕寄書郵。篋中一卷西征集，更與何人共唱酬。

登滕王閣

高凌碧落俯層瀾，老眼重開一大觀。笑閱星霜如隔世，癸亥甲子間曾遊此閣，今三十餘年矣。閒思今古幾憑欄。帆移雲影千山動，湖納江流萬頃寬。時江水暴漲丈餘，沙洲皆沒。校是詩翁無筆力，不留名姓避王韓。

飲胡都閩德菴署中荷亭上二首

三十餘年話舊遊，也曾投筆覓封侯。邯鄲枕上夢初覺，一笑看成兩白頭。庚申辛酉，余客黔陽幕府，胡時以武科從軍。

柳外風來灑面涼，雨餘三畝好池光。借君酒盞勸君醉，莫負滿亭荷葉香。主人善飲，故戲云。

端陽前二日遊北蘭寺四首時李暘谷挈榼小飲列岫亭葉素我尊聞

姪楨_(六) 兒俱在座

北蘭寺在沙城北，旁置孤亭縹緲間。碧樹陰交三面暗，獨留一面對西山。
彩旗畫鼓沸中流，想像蛟龍畫出遊。今日無人觀競渡，去年此地有沉舟。
時當事嚴禁競渡。若將世法苦相繩，何地能容世外僧。來往風流今已矣，居人猶說宋中丞。
傷老僧淡雪也。元氣茫茫散不收，尊前聊記五人遊。衰年未必能重到，更爲斜陽作少留。

李壻暘谷追送於滕王閣下臨發歸舟二章留別

去便經年隔，來爲半月留。那無兒女戀，偏動別離愁。落日當高閣，清江帶小舟。
臨行一杯酒，衰暮重回頭。

清德尚書後，尤宜愛此身。一村無兩姓，宗伯公世居吉水之谷村，聚族至二千人。八座有重親。
壻雙親俱早世，而祖母劉太夫人尚在養。子出須斟酌，吾歸合隱淪。相思還命駕，後會豈無因。

晚渡鄱陽湖夜泊瑞洪

黃梅連日雨，濁浪入湖平。沙柳罾邊沒，霞天鳥外晴。岸容移晚景，風色_(七)緊歸程。忽

報帆飛渡，前村戍火明。

行經貴溪縣赴同年王辰幟之招即席分韻

花草瓊林語，於今十二年。君方行綰綬，我已賦歸田。邑有延賓館，門停載酒船。慚非徐孺子，此榻爲誰懸？

廣信舟中望靈山

頑石四百里，自安仁至鉛山，河口臨江，石山狀如覆盎，草木不生。茲焉秀獨鍾。翠屏三十六，不數九芙蓉。

五月二十六日到家驚聞兒建京師訃信傷慘而作七首

去歲夏四月，兒來告行期。我時臥在床，汝去故遲遲。我欲速汝出，慰汝以好辭。爲言吾雖衰，歲月尚可支。銓除汝已及，行且把一麾。勿論地遠近，三年望旋歸。詎料凶問來，哀哉甫及替。兒亡於四月九日。此語恍如昨，此情痛難追。

一家仕同朝，出處分相謀。父既罷官去，子當偕歸休。奈何復遣行，夙疾況未瘳。致汝道路死，非汝命不猶。爲父實不仁，自傷還自尤。嗟嗟悔已晚，餘憾徹九幽。